

[Augsburg], 28. Februar 1555

An Joachim Camerarius d. Ä.

BSB, Clm 10370, Nr. 249.

Clarissimo viro, D. Ioachimo Camerario, Domino et amico suo colendo. Leipzig.

S. D. Ego verò tarditatem in rescribendo tuam longè supero. idquē eò maiore cum venia facere mihi videor, quod quo diutius expecto aliquid scriptione dignum, eò minus reperio. Nam δημώδη ταῦτα de Comitijs, nec digna sunt, hactenus quidem, scriptione, et vt essent, ex alijs ea facilius cognosceres, quam ex meis literis, neque dubito quin vulgus etiam isthic sciat melius quid hic agatur, quam ego. οὗτως ἀφροντίστως μᾶλλον δ' ἀναισθήτως ἔχω τῶν τοιούτων, πάλαι πεπεισμένος, ὅτι πάντες οὐκ εἰς μακρὰν ἀπολούμεθα, ἀν μὴ θεός τις ἀπὸ μηχανῆς τὴν μανίαν τὴν ἡμετέραν καὶ μιαιφόνους διαφωνίας εἰς ὁμόνοιαν σώφρονα μεταστήσῃ. Omissis igitur ijs rebus, quas sine molestia cogitare nequeo, κεφαλαιωδῶς respondebo epistolae tuae Nonis Nouembbris datae mihiqüe non diu ante Cal[endas] Ianuarias redditiae.

Ac primum de praefatione τῶν ὄπλομαχικῶν gratiae tibi aguntur ab Hectore nostro, quamuis ea nunc vti non possit, libro iampridem in aulam Caesaream misso.

Themixtitanam astrologiam audio è Georgio Fuggero planè esse πυθωνικὴν καὶ μηδενὶ φυσικῷ συνεστάναι λόγῳ. οὐδὲν οὖν ἡμῖν καὶ κακοδαίμοσι. Neque etiam de illarum gentium moribus alia ferè huc perferuntur, quam in illo Noui orbis opere continentur.

Petrus noster iam tum μετοικεσίαν moliebatur, quam nunc, vtinam suo commodo, absoluit. Valet ille quidem ingenio, doctrina, facundia. sed cum his virtutibus coniunctam habet φιλονεικίαν, κακηγορίαν, παροινίαν quae res effecerunt, vt non magnopere desideretur a nostris. Ego verò etsi parum ei praestare potui, candorem tamen et benevolentiam meam nunquam desiderasset, si ijs vti vel potuisset vel voluisset.

Tuum ὅναρ ὕπαρ vtinam ante triduum habuisse cum adesset ab Oporino tabellarius, cui Aeschineum et Demosthenicum indicem Basileam perferendum dedi vnā cum deprauatorum locorum castigationibus. Nunc fieri vix posse arbitror, vt illud ad has nondinas excudatur. Nam incertum est an intra paucos dies se nobis offerat tabellarius. Quod nisi factum fuerit, ego ipse Francofordiam perferam, quo mihi herilis Bibliothecae instruendae ergo proficiscendum est. Vale tibiqüe persuadeto, me vitam prius, quam tui memoriam, obseruantiam, amorem, amissurum. Pridie Cal[endas] Martias Anno 1555.

Hiero[nymus] Wolfius  
Tuus.